



Impactful Women Project



Nicole Hoevertsz

IMPACTFUL WOMAN

Ta practica deporte di landamento desde 9 aña.

Graduado di Universidad di Leiden (Hulanda) como Meester in de Rechten, specialisa den Derecho Internacional.

Secretaria General di Comité Olimpico Arubano.

Prome hende muher (na 1998) cu a bira miembro di Comité Ejecutivo di e Organización Deportiva Panamericana.



1. Ken ta *Nicole Hoevertsz* na banda di e mundo di synchro swimming?

Deporte en general y particularmente e deporte di landamento sincroniza (tambe conoci como synchro y awendia como landamento artistico) ta e deporte cu mi a practica for di e edad hoben di 9 aña y cu a habri porta pa mi den bida. Deporte a hasimi e persona cu mi ta awe. Ela hibami na descubri e mundo precioso di Olimpismo y a lagami alcanza funcionnan nacional y internacional den organisacionnan deportivo.

2. *Nicole Hoevertsz* tin hobby cu ta hasi den *Nicole Hoevertsz* su tempo liber/ priva?

Mi no por bisa cu mi tin hopi tempo liber, pero e tempo liber cu mi tin mi ta gusta pasa cu mi famia y amigonan, particularmente mi grupo di amiganan, tur di nan ex landadornan di synchro nan mes, cu mi tabata tin e honor di por a coach pa varios aña. Despues di a termina nos carera deportivo nos a keda semper cu un amistad, te día di awe.

3. Ki estudio *Nicole Hoevertsz* a hasi?

Mi ta un graduado di VWO na Colegio Arubano.

Mi a hasi e prome parti di e estudio di Ley na Universidad di Antiyas Hulandes y eynan a termina e Basisdoctoraal cu éxito.

Despues di esey mi a studia ley na Universidad di Leiden (Hulanda), caminda mi a gradua den Derecho Hulandes, specialisa den Derecho Internacional. Esey a dunami e derecho di usa e titulo Meester in de Rechten.

4. Con *Nicole Hoevertsz* a cuminsa practica y drenta e mundo di synchro?

Mi inicio den e deporte di synchro tabata na 1973, ora cu un pareha Hulandes a introduci e deporte aki na Aruba. Mi tabata tumando zwemles cerca meneer Jean Baiz, cu a sugeri na mi mama pa mi purba e deporte nobo cu a caba di cuminsa e tempo ey. Mi a bai di acuerdo y for di e prome momento a encanta e deporte! Mi a practica synchro for di 1973 te cu 1984 como parti di e club The Barracudas. Durante e periodo ey mi a competi varios biaha na nivel local y internacional. Mi ta orguyoso di por a culmina mi carera competitivo participando na e Weganan Olimpico di Los Angeles 1984 den e prueba di duet, hunto cu Esther Croes, cu awendia ta mi cuña.

Despues di e participación Olimpico mi a termina mi carera como atleta y a bira entrenadora di e equipo di The Barracudas, por cierto e único club di synchro na Aruba. Te cu 1998 mi tabata activo como entrenadora, semper como voluntario.

For di 1991 mi a bira activo como dirigente deportivo, den e función di Secretaria General di Arubaanse Zwembond. E función ey, tambe uno voluntario, mi a ocupa pa 23 año. Na e momento ey mi a dicidi di no sigui mas den e función, mirando cu ya mi tabata activo den Comité Olimpico Arubano (COA) como Secretaria General. E función ey, Secretaria General di COA, mi ta ocupa te cu awe.

5. Con *Nicole Hoevertsz* ta balancia bida personal, bida deportivo y profesional ?

Mi ta purba di balansa mi diferente tarea y responsabilidnan pa medio di un bon planificacion. Ademas mi ta scohe loke pa mi ta prioridad den bida. Mi a scohe pa dedica hopi tempo na deporte, loke mi ta gusta y ta dunami hopi satisfaccion. Crea oportunidad pa hobennan y laga hende disfruta di tur e beneficianan di deporte ta importante pa mi.

Mi a combina mi actividadnan di deporte semper cu mi carera profesional. Pa casi 30 año mi ta traha como empleado publico pa Gobierno di Aruba. Durante e añanan aki mi a traha como hurista na Directie Buitenlandse Betrekkingen y pa ocho año tabata Secretario di Consejo di Ministro. Ta trata di funcionnan cu hopi responsabilidad y cu a hasi cu mi dianan semper tabata largo, cu realmente poco posibilidad pa un bida social activo. Pero esey ta un escohencia cu mi a hasi y cu mi a no a arepentí nunca.

6. Cual ta tur e competencia nan cu *Nicole Hoevertsz* a participa na dje ? I kiko ta tur e titulo nan cu *Nicole Hoevertsz* a logra conquista?

Durante mi carera como atleta mi a competi na nivel nacional y internacional. Mi tabata campeon Arubano, campeon Antiyano y a logra conquista titulo regional tambe. Hunto cu mi compañero di duet nos a yega te na semifinal di e Campeonato Mericano.

Mas orguyoso sinembargo mi ta di e progreso cu e deporte di synchro a logra durante mi

periodo como entrenadora y dirigente. Nos a cambia e forma di traha pa uno mucho mas profesional, envolviendo tambe – pa prome biaha – entrenadornan profesional for di exterior. Trainingnan a bira mucho mas intensivo y e deporte a cuminsa competi mas frecuente tambe den exterior y na un nivel halto. Loke indudablemente a aporta na e progreso tabata e hecho cu na final di añanan nobenta Aruba porfin por a conta cu un piscina Olimpico. Esey a duna e atletanan mihor oportunidad pa entrena y a hasi cu Aruba por a organisa competencianan internacional tambe. Tur esaki tabata tin su resultado.

Landadornan sincroniza di Aruba ta campeon di Caribe pa dos decada caba y Aruba ta wordo considera un potencia internacional den e deporte aki. Na dos ocasion Aruba a participa na Weganan Olimpico den synchro : durante e Weganan di Los Angeles (1984) e honor a toca na Esther Croes y mi persona, mientras cu na e Weganan di Seoul (1988) mi a fungi como entrenadora di e dueto forma pa Roswitha Lopez y Yvette Thuis.

Ademas di esaki landadornan sincroniza di Aruba a participa na campeonatonan mundial, regional y continental, y tambe na Weganan Suramericano, Weganan Centroamericano y del Caribe y Weganan Panamericano. Dos di nos mihor landadornan a yega te na top di e deporte na Merca, a studia y competi cu un beca y a logra conquista te hasta titulo di Campeon di Merca. E atletanan cu a logra e titulonnan aki ta Anouk Eman y Kyra Hoevertsz.

7. *Nicole Hoevertsz* tin otro reconocimiento/ logronan na *Nicole Hoevertsz* su number?
I den kiko esaki nan ta?

Como dirigente deportivo mi ta orguyoso di a logra ocupa varios funcion. Na nivel nacional mi ta Secretaria General di Comité Olimpico Arubano, e organisacion cu tin 24 Federacion Deportivo Nacional como miembro.

Na nivel internacional mi tabata e prome hende muher (na 1998) cu a bira miembro di Comité Ejecutivo di e *Organizacion Deportiva Panamericana*, e organizacion cu tin 41 Comité Olimpico Nacional di e continente como miembro. Awendia e organisacion a camia su number y a bira PanAm Sports. Mi ta ocupa te ainda e funcion di Miembro di Comité Ehecutivo di PanAm Sports y ta tambe e Canciller di e organisacion, esta e Hefe di Protocol.

Pa mas cu 15 aña mi a presidi e Comision Mujer y Deporte na nivel continental y a traha pa motiva y prepara más hende muher pa bira activo den deporte.

Na 2006 mi a wordo eligi como Miembro di Comité Olimpico Internacional, e organisacion cu ta responsabel pa e Weganan Olimpico y cu ta guia e 206 Comité Olimpico Nacional rond mundo. IOC ta conta cu 115 persona como Miembro di tur parti di mundo. Solamente 39 di nan ta hende muher.

Den IOC mi ta forma parti di varios comision:

- ✓ Audit Committee
- ✓ Legal Affairs Commission
- ✓ Olympic Solidarity Commission
- ✓ Coordination Commission Olympic Games Tokyo 2020
- ✓ Coordination Commission Olympic Games Paris 2024 (Vice President)
- ✓ Coordination Commission Olympic Games Los Angeles 2028 (President)

Na 2017 mi a wordo eligi como Miembro di Comité Ehecutivo di IOC, esta e Directiva principal di IOC. Esey ta trece cu ne mas trabou y responsabilidad, incluyendo tambe e tarea pa representa IOC na cierto ocasion.

Loke ta motibo di orguyo particular ta cu mi a wordo nombra presidente di e Comision di Coordinacion pa e Weganan Olimpico di Los Angeles 2028, cu ta e ciudad caminda mi a competi na 1984.

8. *Nicole Hoevertsz* ta involvi cu instancia nan carecativo?

For di un edad hoben mi ta activo den deporte, na diferente manera y den diferente función. E ta un privilegio di por hasi esaki y pa di e forma aki dedica na adelanto di hobennan y di nos pais Aruba. Cada logro, chikito of grandi, ta yenami cu orguyo y satisfacción. Tur e organisacionnan aki den cua mi ta involvi ta organisacionnan sin fin di lucro, pues ta trata di tareanan voluntario.

9. *Nicole Hoevertsz* tin un mensahe pa e hende muhernan (hoben/Young professional) di Aruba?

Na varios momento den mi bida mi tabata tin e privilegio di ta e prome hende muher den un funcion y te ainda sa pasa regularmente cu mi ta traha mas tanto cu hende homber. Mi ta trata semper pa motiva y stimula otro hende muhernan pa tambe bira activo den deporte y particularmente den e posicionnan caminda ta tuma decision, e directiva di un organisacion deportivo. Asina mi ta haya sumamente importante pa prepara un generacion nobo y hoben di dirigentenan pa futuro. Pesey mi ta bisa semper cu ta bunita pa ta e prome hende muher den un funcion, pero ta mas importante pa percura pa bo no ta e ultimo! Percura semper pa ora cu bo a yega na e top, pa manda e lift bek abou pa busca mas hende muhe y yuda nan tambe yega na e posicionnan mas halto. Esey ta nos tarea!

WOW Aruba

Women empOwering Women

wowarubainfo@gmail.com

<https://www.wowaruba.org/>